

FGCA:

## Ban stimula e practica di bon gobernacion



**Riba dia 26 di februari 2016 a keda constitui e fundacion "Stichting Deugdelijk Bestuur Aruba"; na Papiamento lo adopta e nomber "Fundacion Gobernacion di Calidad Aruba" (FGCA).**

E meta principal di e fundacion aki ta pa stimula traves di tur medio legal na su disposicion e practica di bon gobernacion den tur aspecto. Pa logra esaki e fundacion lo recauda fondo pa facilita investigacion riba tereno specifico cu ta relaciona cu bon gobernacion, pa yega na conclusion basa riba hecho

encuanto e situacion actual, y pa aporta cu recomendacion concreto na mehoracion di e situacion cu bista riba futuro. E fundacion ta reconoce e trabao cu a ser haci caba den pasado den intento pa mehora calidad di gobernacion, cu a conduci na rapportnan importante manera e famoso rapport 'Calidad', e rapport di e comision 'Mehran' (rapport di National Committee on Public Finance), y varios protocol cu a keda acorda entre gremio empresarial, sindicato y partido politico. Ta e intencion pa tuma tur e iniciativanan di pasado como un punto di salida pa investiga-

cion y evaluacion cu lo tuma luga proximamente. Lamentablemente por constata cu 30 aña despues di adkiri nos Status Aparte, unda cu nos mester a proba cu nos ta capaz di garantiza bon gobernacion, esey ta leu di ta e caso. Sin pretende di menciona tur area problematico, por bisa cu maneho financiero y di recurso humano, falta di transparencia, patronahe politico, falta di planificacion, mehoracion di servicio na publico, ta areanan cu merece atencion. Y como cu no mester sinta warda pa gobernacion mes drecha su mes, ta kere cu ta bira tempo



pa cuminsa cu iniciativa di ciudadano pa purba stimula practica di bon gobernacion. Pa e investigacionnan cu lo programa, lo haci uzo di e servicionan di diferente experto local riba e terenonan al caso, pa por garantiza un trabao profesional y confiabel. E fundacion ta posiciona su mes como un organismo cu no ta expresa ni apoya punto di bista di ningun partido politico, pero mirando e caracter di e trabao cu ta desea di desplega, lo trata na mantene bon relacion cu tur partido, y tambe cu tur entidad den sector publico y priva. FGCA kier logra ehecuta su metanan den un discusion habri y franco cu tur partido involvi, no solamente cu (partido) politico, sino tambe cu e gremionan comercial y sindical, y cu agrupacion comunitario. Asina kier crea un

plataforma hopi amplio pa crea un Aruba cu ta funciona segun e principionan di bon gobernacion den un estado di derecho democratico. Si FGCA ta logra su metanan, esaki lo resulta di ta e regalo di mas valioso pa comunidad di Aruba na ocasion di su celebracion di himno y bandera y Status Aparte.

E iniciativa pa lanta e fundacion aki ta ser carga pa Armand Hessels, presidente, drs. Leo Maduro, secretario y Servito Thijsen, tesorero, cu conhuntamente ta forma e prome directiva di e fundacion. Banda di e directiva e fundacion ta conta cu un hunta di conseho den cual ta invita personanan di cierto prestigio profesional, cu ta bay yuda sostene trabao di e fundacion cu nan conseho riba e terenonan den cual e fundacion ta move. □